

In raquint sincer d'ina dunna da 77 onns

DA CLAUDIA CADRUVI / ANR

■ **Cun 77 onns ha Pia Deplazes da Surrein dà ora ses emprim cudesch. Ella raquinta a moda sincera e simppla da sia vita.** Il stil che Deplazes dovra, n'èn ins betg pli disà ozendi. El resplescha dentant il pensar e resentir da sia generaziun. Gist perquai è il cudeschet ina lectura interessanta era per la generaziun giuvna. La giuventetgna dad oz n'enconuscha betg las relaziuns stretgas d'avant sessanta onns ch'ins stueva spargnar per mintga expensa. Quai descriva *Pia Deplazes* en «Quels da pli baul». Ils plets ch'ella ha mess en fila expriman gronda amur per ils vischins e parents da quel temp. Il cudeschet duai esser in engraziament per augs, ondas e geniturs, ch'èn ids cun bun exempel ordavant ed han formà ella.

Captivant è che l'autura scriva da sasezza. Ella scriva cun il «jau». Quai è persuadent.

Politica e religiuin

A moda grada relatta ella sias ponderaziuns politicas. Ina giada u l'autra para Deplazes bunamain d'esser ina revoluzra. En auters lieus s'exprima ella plitost a moda patriota. Ils patratgs politics caveglia ella sper sia cardientscha. Ella afferma quant impurtanta che la cardientscha è stada per ella.

Sch'ella menziunescha ils geniturs, na dovra la scriptura mai be il pled mamma u bab. Igl è adina la buna mamma, la mamma lavurusa u il bab buntadai-vel etc.

Pli che dudesch uras lavur mintga di

«Emprender in mistregn en da quellas cundiziuns finanzialas ha mess si baul cavester a nus mezs orfants», scriva Deplazes. Ses bab è mort già baud. «Ina mudesta pensiun da nies bab, installatur da telefon, ha gidau ord la pli urgenta miseria materiala.» I saja stà in plaschair da purtar a chasa bunas notas: «In tec luschezza dalla mumma motivava nus leutier.» Era sch'ella lauda per gronda part ils vischins, na manca era betg critica: «Ils vischins segidavan sil pli cun empau scuidonza.»

Paucas dunnas da la generaziun da Deplazes han pudì emperender in mastregn. Cun blera energia ha ella dentant emperendi da tgirunza. Sco tgirunza ha ella lavurà en il spital chantunal e descriva il clima: «Diaconessas da Turitg devan en il tun a nus autras tgirunzas diplomadas.» «Nus entschevevan il di allas 5.30 e finevan quel cun ni senza glina pleina allas 20.00/21.00.»

«Il bastard da Paris»

Interessant èn era ils raquints dals per-

davants che han stuì emigrar en l'America per mitschar da la naira fom. Auters han tschertgà paun e gudogn a Paris, p. ex. la tatta Margreta cura ch'ella era ina giuvnetta. «Sunter entgins onns ha la 'tatta' fatg enconuschientscha cun in giuven... Ils dus havevan bugen in l'auter. Cura che la tatta ei vegnida purtonta, ha l'amicezia denter il fegl e la jastra calau, sin strict camond da quella mumma.» Gnanc in tschientaner pli tard sajan sumegliontas chausas capitadas era a Surrein, nua che geniturs severs schevian: «Mo buca jasters.» Ma avant che quai è succedi è il «bastard da Paris», sco vischins numnavan el, creschì si a Surrein. I sa tracta dal bab da Pia Deplazes. El è creschì si tar ses tat e sia tatta «ed ha gudiu in'afonza sulegliva ell'umbriva enconuschenta da Surrein.»

Era la scriptura è stada bler davent. Deplazes ha lavurà a Genevra, Losanna, Berna ed en Frantscha. Il scriver è stà insatge impurtant durant sia entira vita. Ella ha scrit brevs, ma ha era adina puspè dà sinzurs en la pressa rumantscha. A la fin dal cudeschet aschunta l'autura tschintg artitgels ch'ella ha publictà en la «Gasetta Romantscha» ed en La Quotidiana.

«Quels da pli baul» pon ins empustar directamain tar Pia Deplazes, Plazzas-sut, 7173 Surrein. El custa 12.50 francs.



Pia Deplaz ha edi in cudesch davart sia vita.